

իրենց կորեկը կամ սիմինդը: Աւելի խորը մտնելուց յետոյ՝ այլ եւս չէք տեսնել սայլորդն իր բլրանման բարձած խոտով, որոնք քաշում են դոմչի լծկանները: Չկայ դաշտ, չկան ազատ հովիտներ, չկայ սայլի ճանապարհ, անվերջ անցնելու էք նեղ-նեղ կիրճերից ու ձորերից, ուր պարբերաբար ձեզ դիմաւորելու են էշի, ջորու, եզի եւ ձիու կարաւաններ, որոնք կորացած ծանր բեռի տակ՝ անվերջ տքալով բարձրանում են դէպի Բարձր Հայք: Շրջապատն անտառ է կամ մացառ, էլ չէք տեսնի սեւ-սեւ հերկեր, ագարակներ. դալար է ամէն կողմ: Անվերջ անտառ ու շամբ է, ուր վխտում են կթիւան ու վիթր, դայլն ու արջը, վարազն ու կինճը եւ թռչունների երամակների երգն ու ճիչը օդն են թնդացնում: Թորթումին նման են Նարիմանն ու Պարգուղը, Փէնէկն ու Փէնէզկերտը, Թաուճքարն ու Կիսկիմը, Պալխարի ու Բալխի հովիտները, նոյնպէս Սպիրի երկար հովիտը եւ Բալխսոռը:

Փխտոնի ափերի ոսկեխառն աւազը վէպերի եւ պոէմների առասպելական նիւթ է մատակարարել նախապատմական շրջանից սկսեալ: Ասորեստանի բռնակալ Սարգոնը ձգտել է Կիցկային ու Սալխալին նուաճել անշուշտ սրանց ոսկու հանքերին տիրելու տենջանքով: Բալխասը Ճորոխի Աւագանի վրայ յարձակուել է Ամիսոնական զորքերով, նրա ոսկու հանքերը իւրացնելու